

rem praeberes. Neque vero TE fugere potest, quam TE serena fronte hilarique ore exceperim, quum paucos post dies me adires, ut notum mihi faceres, cogitare TE de libello academico disceptandi causa conscribendo. Certe mihi est iucundissima dubitationis TVAE recordatio, victoriaeque, quam mihi concederes, quum fluctuantem inter pietatem, qua tam me auctorem sequi consueuisti, quam quod PATRI OPTIMO gratum intelligeres omni studio efficere, & modestiam, qua, ne quid arrogantius, aut inuidiosius susciperes, extimescebas & verebaris, animum TVVM ad perficiendum consilium confirmarem, quod & TIBI honorificum, & PATRI iucundum, & mihi multis nominibus suauiissimum & acceptissimum intelligebam. Sed testor TE, OPTIME CRAMERE, fueritne serenior frons, lactiorque vultus, quo & hodie TE excipiebam libellum proprio Marte a TE conscriptum, iam typis excudendum, mihi offerentem, & illum TE praesente perlustrans, perpauca debebam, pauciora adiciebam, non nulla immutabam, leuiora quidem ea omnia, omniaque TE ipso probante ita correcta, ut, quae hic legantur, plane TVA sint & manserint. Sed & publice hoc fide boni viri profiteri mearum duxi esse partium, nihil esse in hoc libello, quod meum dici possit, ne argumenti quidem electionem, sed haec omnia TE TIBI iure TVO vindicare. In laudibus TVIS non multus ero. Quid enim laudibus TE efferam, quem scio omnibus bonis hic loci ita probari, & ubicunque perueneris ita probandum esse, ut laude mea qualicunque non indigeas. Sed OPTIMO PATRI, quem Deus & amet & seruet, Patriaeque non vanum me scio augurem futurum, si eum TE praedicem, quem olim aliquando PATER senectutis habebit solatium, patria decus, doctoresque, inter quos me esse, nunquam me poenitebit, habebunt dulce ornamentum. Vale igitur MI CRAMERE, nec absentem me animo TVO excidere patiare. Iterum vale. Scribeb. Kiliae Holsat. in museolo a. d. VIII. Aprilis. A. O. R. clc̄lccclxxxii.

